

# EBBALUWA OYAAKOBBO EGIYAWANDIIKIRE **Enyanjula**

Ebbaluwa eenu oYaakobbo niye eyagiwandiikire. OYaakobbo oyo kyezyeka okubba niye oodi omuganda wa Yesu. Era yabbaire mwekubbemberi omu kanisa eyasookere, era nga moiza oku b'akakiiko ak'e Yerusalemi (Bik 15:13). Omutume oPawulo era yamwetere "Mpango" ow'ekanisa (Bag 2:9). Abakugu omu by'eBbaibbuli baikirirya bati, oYaakobbo yawandiikire ebbaluwa eenu mu mwanka ooti gwa 50 nga bamalire okubyaala okurisito. Era baikirirya bati, yagiwandiikire oweyabbaire omwekubbemberi ow'ekanisa y'omu Yerusalemi, era yagiwandikiire niyo.

Ebbaluwa eenu oYaakobbo yagiwandikiire "Bayudaaya aBakurisitaayo abairukiire omu byalo ebitali bimo" (1:1). Omu bbaluwa eenu oYaakobbo alangaasira akakwate akaliwo akati wa kwikirirya n'ebikole ati, okwikirirya okwamazima bakulaga mu bikole (2:17). Era alabula oku kumomola omu bantu nga badi abasuni obakodooca (2:1-4). Era atukoba okwegenderezanga omu bintu ebitutumula (3:1-12). Abaikirirya bonabona bezya okukolesya amasomo agali omu bbaluwa eenu, olwakubba ekwata oku masomo mangi agatukwataku swe-naswena ng'abaikirirya.

**Engeri egibyecaanamu**

1. Okweyanjula era n'obusugirye 1:1.
2. Okwiryamu abaikirirya amaani 1:2-27.
3. Engeri egikyetaagisya okulaga okwikirirya 2:1-26.
4. Engeri ebibono egibyezya okubba eby'amaani 3:1-12.
5. Enjabulo akati w'amalabuki ga Kibbumba n'ag'obuntu 3:13-4:10.
6. Okulabula oku kutabanga owamalala 4:11-5:6.
7. Ebibono ebisembayo 5:7-20.

<sup>1</sup> Nze oYaakobbo omuweererya wa Kibbumba, era n'owa Musengwa oYesu Kurisito, mbawandiikira inywe aBayudaaya abaikiririrya omu Yesu Kurisito abairukiire omu byalo ebitali bimo.

*Okwikirirya, n'okubagezesya n'amalabuki*

<sup>2</sup> Aboluganda omu Kurisito, owemugwanga omu bikemo ebya buli ngeri, mubbenge n'eisangaalo, <sup>3</sup> nga mumaite muti okugezesya kw'okwikirirya kwanywe, kubazweramu okuguminkiriza. <sup>4</sup> Okuguminkiriza owekukakatira nakimo mwinywe, musuuka bantu abatuukiriire nakimo era mpaawo ekimubulwaku. <sup>5</sup> Abba nga mwinywe mulimu adamba amalabuki, asabe oKibbumba agabira buli moiza n'ekisa anambula bukenge, yagamuwa. <sup>6</sup> Asabe ng'ali n'okwikirirya, nga tabuusabuusa naire. Oyo abuusabuusa nga tagumira oku kyaikirirya tumufaananiaku n'eiyengo ly'omu nyanza, ompunga eryatwala,

n'aliirya eenu n'eedi. <sup>7</sup> Omuntu ow'engeri eyo tiyaseega ati aliku n'ekiyalisuna okuzwa e wa Musengwa, <sup>8</sup> olwakubba w'emyoyo mibiri, yonayona egyabba tatyamikica.

*Obukwenda eeri abadoobi n'abasuni*

<sup>9</sup> Owoluganda omudoobi asaaniire okwesi-ima, olwakubba oKibbumba iye amubonera kwidaala ly'angulu. <sup>10</sup> N'omwikirirya omusuni, yena asaaniire yeesiime owebamwicaica olwakubba mwikirirya wa Kurisito, olwakubba omuntu omusuni ow'oku kyalo kunu azwa kuwaawo ng'ekimuli ky'okwisubi. <sup>11</sup> Eisana oweryaka ni lyoca n'eibbugumu lyalyo eringi, likalya eisubi, n'ekimuli kyalyo ni kigwa, n'obusa bw'emboneka yaakyo ni buwaawo. N'omusuni atyo yalirikira lumo, ng'ali mwebyo ebyayayaanira okukola.

*Okubakema era n'okubagezesya*

<sup>12</sup> Yeesiimire ino omuntu oyo aguminkiriza omu kiseera ky'okumukema, olwakubba oweyalimala okuwangula, balimuwa obwomi oKibbumba obuyasuubizire abamutaka ng'engule y'obuwanguli. <sup>13</sup> Omuntu owebamukemanga takobanga ati, "OKibbumba niye ankema." Ekyo kityo olwakubba oKibbumba takema n'ekibbikibbi, era iye onyere takema muntu yenayena n'ekibbikibbi. <sup>14</sup> Wazira omuntu asuna ekikemo, ng'okwegomba okubbikubbi kuzwa omu mwoyogwe, ni kumubbeyabbeya. <sup>15</sup> Kaisi okwegomba okwo owekwizulira nakimo, ni

kubyala ekibbikibbi. N'ekibbikibbi ekyo owekikula, ni kibyala okufa. <sup>16</sup> Kale boluganda abatake eino, tibababbeyabbeyanga oku bya kukema.

<sup>17</sup> Aate buli kirabo ekisa era ekituukiriire kizwa omwigulu, ni kiika okuzwa egiri oKibbumba eyabbumbire ebyakira angulu omwibbanga, oyo atacuukacuuka ng'ebiiriye owebikola. <sup>18</sup> Yateesere okululwe, n'atuwa obwomi obuyaaka obw'omu mwoyo, ng'abita mu kutwezyesya kwikirirya kibonokye eky'amazima. OKibbumba yakolere ekyo, kaisi iswe tubbe n'ekifo ekisooka omu bibbumbeye.

### *Okuwulisisya n'okuteeka omu nkola*

<sup>19</sup> Boluganda abatake eino, mumanye kinu muti: Buli muntu abbenge mwangu okuwulira ekibono kya Kibbumba, neye tiyaabbanga muntu abbubbukira okutumula. Era tiyaabbanga muntu anyiiga mangu; <sup>20</sup> olwakubba obusungu bw'omuntu tibuleetawo bwomi obutuukiriire oKibbumba obwasiima. <sup>21</sup> Mulekewo emize gyonagyona n'empisa embiibbi ebiizwire omu bantu. Mwikiriryenge n'obugondi bwonabwona ekibono kya Kibbumba ekibasigiremu ng'abeezyesya okukiwulira, era ekyezya okulokola obwomi bwanywe.

<sup>22</sup> Ekibono ekyo timwakomanga kukiwulira-buwuliri neye mukikoleregeku, olwakubba owemutakola ekyo, okwo kubba kwebbeya-bwebbeyi. <sup>23</sup> Ekyo kityo olwakubba awulira-obuwuliri ekibono n'atakikoleraku, tumufaana-niaku n'omuntu eyeebona omu ndabirwamu.

<sup>24</sup> Owaamala okwebona azwawo n'ayaba, neye amangu ago ni yeerabira ng'owaafaanana.

<sup>25</sup> Neye oyo eyekeenenya ekibono kya Kibbumba, ekituukiriire era ekitusuuca ab'eidembe okukola ebyataka, ni yeekalangulira mwikyo, ng'akola ebikikoba amanteerabira, oyo yasunanga enkabi omu byakola.

<sup>26</sup> Buli eyeetwala okubba omunadiini neye n'atafuga olulumirwe, oyo abba yeebbeya-bwebbeyi, era ediiniye ebba mpaawo kyemugasa.

<sup>27</sup> Ediini entuce era ebulaku kyokuginenya omu maiso ga Kibbumba oItewaiswe, niyo eenu: Okulabiriranga abafuubbi n'abanamwandu omu budoobi bwabwe, n'okwekumanga eby'ekyalo okutatwonoona.

## 2

### *Okutamomola abantu*

<sup>1</sup> Aboluganda, inywe abaikirirya oMusengwa waiswe oYesu Kurisito ow'ekitiisya, timwamomolanga abantu. <sup>2</sup> Singa omuntu oyo azwaire ebizwalo ebisa n'empeta ey'ezaabbu aingira omwikumbaaniro lyanywe, n'omudoobi oyo azwaire ebitimbo yena n'aingira, <sup>3</sup> owemwanirizaku oyo azwaire ebizwalo ebisa, ni mumukoba muti, "Iwe otyame aanu awasa." Kaisi omudoobi iye ni mumukoba muti, "Iwe oyemerere-bwemereri," ooba muti, "Otyame ansi aawo." <sup>4</sup> Aale awo timubba mumomoiere era ni mwesuuca balamuzi abali n'enseega embiibbi?

5 Muwulire, boluganda abatake eino! Abadoobi omu by'omu kyalo kinu oKibbumba tiniibo abeyalondere okubba abasuni omu kwikirirya, era n'okusuna obwakabaka obuyasuubizire abamutaka? 6 Neye inywe mujerega abadoobi, kaisi ni muwa abasuni ekitiisya. Abasuni tiniibo ababamigirirya, ni babakulukuusa okubatwala omu mbuga gy'ab'amateeka? 7 Tiniibo abazumirira eriina ly'ekitiisya erya Yesu oMusengwa waanywe?

8 Owemutuukirirya eiteeka erikirira nakimo obukulu eriri omu Biwandiike, erikoba liti, "Otakege omuntu omwinawo, ng'oweweetaka iwe onyere," mubba mukolere kintu kisa. 9 Neye owemumomola abantu, mubba mukolere kibbikibbi, era eiteeka libasingisya omusango ogw'okuvuna aMateeka gonagona. 10 Nabuli akwata amateeka agasigaire, neye n'avunaku erimo abba n'omusango gw'okuvuna aMateeka gonagona. 11 Ekyo kityo olwakubba eyakobere ati, "Tiwayendanga," era niiye eyakobere ati, "Tiwaitanga omuntu." Kale owootayenda, neye n'oita omuntu, obba ovunire amateeka. 12 N'olwekyo mutumulenge era mukolenge ng'abantu abebalisalira omusango kusinzirira ku Mateeka gadi agatusuuka ab'eidembe. 13 Ekyo kityo olwakubba omuntu atasaasira, balimusalira omusango omu maiso ga Kibbumba nga tibamukwatira kisa naire. Neye era, omu kusala omusango, oKibbumba abba n'ekisa.

*Okwikirirya era n'ebikole ebyabiraku*

14 Boluganda, kigasa niki omuntu okukoba ati ali n'okwikirirya neye n'atabba n'ebikole ebyabira oku kwikirirya? Okwikirirya okwo dala kwezya okumulokola? 15 Owewabbaawo owoluganda omusaiza ooba omukali adamba ekyazwala, era atasuna ekyokulya ekimumala buli lunaku, 16 neye omoiza kwinywe n'amukoba-bukobi ati, "Otuuke mirembe; nkutakirya obwomi obusa, era olye kusani weeyagale," neye nga tamuwaire ebiyeetaaga, ekyo kimugasa niki? 17 Omu ngeri enanyere eyo n'okukwikirirya kutyo wekuli; owekubba kwonkani, nga mpaaku bikole ebiraga okwikirirya okwo, kubba kufu. 18 Neye oodi ayezya okukoba ati, "Iwe oli n'okwikirirya, neye nze ndi na bikole." Aale kaade ondage engeri omuntu egyayezya okubbaamu n'okwikirirya anambula ebikole ebikulaga, zena n'akulaga okwikirirya okwange nga nsinzirira ku bikole ebiraga okwikirirya okwo. 19 Kaisi tokirirya oti oKibbumba ali moiza? Kisa. Neye mbona n'emizimu gyona gikiikirirya ekyo, era ni gidegeizera olw'okumutya.

20 Musirusiru iwe ataikirirya ekinkoba, dala otaka okumanya oti okwikirirya okubulaku ebikole mpaawo ekikukugasa? 21 Iwe tomaite ng'oIbbulaimu, ozeiza waiswe omu kwikirirya, oKibbumba yamusiimire lw'ekikole ekiyakolere, oweyawaireyo omwanawe oIsaka oku kyoto? 22 Tobona ng'okwikiriryakwe kwayabiraine n'ekikolekye, kaisi okwikiriryakwe ni kutuukirira olw'ekikole? 23 Olwo eKiwandiike ni

kituukirira ekikoba kiti, “Oibbulaimu yaikiriri-irye mwebyo oKibbumba ebiyamusuubizire, n’olw’ekikole ekyo n’amubala okubba atuukiri-ire.” <sup>24</sup> Aale timubona muti omuntu oKibbumba amusiima lw’ebikole ebyakola, neye tirwok-wikirirya kwonkani. <sup>25</sup> Era n’oku Lakabbu oma-laaya tiniye owekyabbaire? OKibbumba tiya-musiimire lw’ebikole ebiyakolere; olwakubba yayanirizire abaizire okukeeta omu kyalokye, era n’ababbeera okusodoka ng’ababitya mu nzira gendi? <sup>26</sup> Kale ng’omubiri ogunambulu-lamu omwigu owegubba mufu, n’okwikirirya kutyo wekuli; owekutabbaaku ebikole ebyabiraku, kubba kufu.

### 3

#### *Okufuga olulumi*

<sup>1</sup> Boluganda, muleke okuweera mu kubba beegesi b’ekibono kya Kibbumba, olwakubba mu-maite muti iswe abeegesi balitusalira omusango n’obukambwe okukiraku abandi. <sup>2</sup> Swenaswena emirundi mingi tusobya omu ntumula, neye tuli n’okwefuda okubona tuti tutumula kusani. Ekyo kityo olwakubba omuntu oyo atasobya omu by-atumula abba atuukiriire, ng’ayegere okwefuga, era ayezya okufuga omubirigwe gwonagwona.

<sup>3</sup> Abantu bateeka ebyoma omu minwa gy’embalaasi kaisi gibawulire, era ni bagitwala yonayona egibataka. <sup>4</sup> N’amaato amanene agatambulira oku maani ga mpunga gona, newankubbaire nga manene, odudumo omutono



ati niiye agavuga, ni gaaba yonayona omuvugi egyabba ataka. <sup>5</sup> N'olulumi lwona lutyo weruli. Newankubbaire nga katundu katyayi kati ak'omubiri, neye abantu balukolesya okwewaanira omu bintu bingi. Tobona ng'ekibira ekinene owekyezya okuya ni kiwaawo nga kizwa ku kasyo akatyayi kati?

<sup>6</sup> N'olulumi lwona luli ooti musyo, kitundu ekiizwire obubbibubbi obw'enkola n'enkola, ekiri omu mubiri gwaiswe. Olulumi lwezya okubebenya obwomi bw'omuntu obulambirira, era ni lukuma omusyo ogubebenya ebintu eby'omu biseera by'obwomibwe bwonabwona, kaisi irwo olunyere ni balukumaku omusyo oguzwera nakimo omu geyeena ogutalikira.

<sup>7</sup> Ebika eby'ebisolo n'eby'enyonyi, n'eby'ebintu ebyekuusira ansi, n'eby'omu nyanza, bifugika, era abantu bazwire ira nga babifuga. <sup>8</sup> Neye irwo olulumi mpaawo muntu ayezya okulufuga. Olulumi niikyo ekintu ekibbikibbi, ekitafugika, era ekiizwire obutwa obwita owundi obwomi bwa muntu ooti saagwa wa mpiri.

<sup>9</sup> Olulumi niirwo olutukolesya okuwuujja oMusengwa oItewaiswe, aate olunyere oolwo ni tulukolesya okulaama abantu abebabbumbire omu kifaananyi kya Kibbumba. <sup>10</sup> Omunwa ogunyere ogwo dala gwezya okuzwamu okuwuujja, era tete ni guzwamu n'okulaama? Boluganda, ekyo tikisaaniire okubba kityo. <sup>11</sup> Ddala onsulo w'amaizi omoiza, ayezya atya okuleeta amaizi agawooma n'amaizi

amalulu? <sup>12</sup> Aboluganda, omusaale omucungwa gwezya okwamaku emiyembe, ooba omukooge okwamaku amapeera? Kityo n'amaizi agalimu omuunyu tigezya okuzwera aamo n'amasa.

### *Amalabuki agazwa omwigulu*

<sup>13</sup> Boluganda omu Kurisito, mwinywe mulimu eyewulira ati ali n'amalabuki? Aale agalagirenge mu mpisagye ensa, mu bikolebye ebisa ebyakola, n'omu bugondi obuzwa omu malabuki. <sup>14</sup> Neye owemubba n'enge egy'akabbikabbi omu myoyo gyanywe, era nga buli moiza nga yeetakirya niiye yenkani ebintu ebisa, timwabbeyesya. Era timwewaana muti muli balabuki, mutyo ni mwakanisya amazima ga Kibbumba agalaga engeri omwikirirya egyateekwa okwebityamu. <sup>15</sup> Ekyo kityo olwakubba amalabuki ag'engeri eyo tigazwa omwigulu, wazira gazwa ku kyalo; g'abantu-buntu, era ga Sitaani. <sup>16</sup> Awabba engongi, era n'abuli moiza nga yeetakirya niiye yenkani ebisa, niiwo awabba n'okutabuka era n'ebikole ebibbibbi ebya buli ngeri.

<sup>17</sup> Neye amalabuki agazwa omwigulu, okusookera nakimo, gabba makenene, ganoonia idembe, era galeeta okulumirwa abandi, n'obuwombeeki, n'okusaasira abandi. Era, gaizwire ebikole ebisa, tigabbaamu kadi kwekubbira, waire obubbeyi. <sup>18</sup> Abantu abaleetawo eidembe olw'okwebitya okusani omwidembe, ekineneka ekibaneneka bwomi obutuukiriire.

## 4

*Okusala omukago n'ekyalo*

<sup>1</sup> Aboluganda omu Kurisito, mutaka okumanya entalo n'oyombo ebibba mwinywe egibizwa? Bizwa ku kwegomba okw'engeri egitali gimo okumubba nakwo, okutaabirana n'ebyo oKibbumba ebyataka. Okwo niikwo okulumba ebiseego byanywe. <sup>2</sup> Mutaka okubba n'ekitiisya era n'ebintu by'omu kyallo neye nga timubisuna. Ekizwamu ni mutaka okwita abantu abo ababakaisya okubisuna, neye era ni musigala nga timubisunire. Omu ngeri eyo musuna oyombo, era ni mulwana. Ebimutaka timubisuna olwakubba timusaba oKibbumba. <sup>3</sup> Waire wona musaba oKibbumba, timubisuna olwakubba musaba na bigendererwa ebibbibibi; musaba by'okwesangaalya-bwesangaali.

<sup>4</sup> Inywe abantu abazwire oku bweyamo bwanywe obw'okuweereryanga Kibbumba yenkani, timumaite muti okusala omukago n'ekyalo kinu kubba kucaawa Kibbumba? Omuntu yenayena owaasalawo okubba omukaagwa w'ekyalo kinu, asuuka mulabe wa Kibbumba. <sup>5</sup> Amo timumaite muti eKiwandiike tikya bwereere ekikoba kiti: "OMwoyo oKibbumba oguyateekere mwiswe w'eiyali libitiriri?" <sup>6</sup> Neye era, oKibbumba atuwa enkabi mpitiriri egitwezyesya okuwangula okwegomba okubbikubbi. Ekyo kityo olwakubba eKiwandiike kikoba kiti: "OKibbumba ayakanisya ab'amalala,

wazira akwatira ekisa ibo abo abawombeeki.”

<sup>7</sup> Kale mugonderenge oKibbumba. Mulwanisye oSitaani, yena yabairuka.

<sup>8</sup> Mwigerere eeri oKibbumba nga muteeka okwesiga kwanywe mu niye, yena yaigerera egimuli. Mutukulye obwomi bwanywe inywe abakola ebibbibbi, mutereerye emyoyo gyanywe inywe ababbeyi. <sup>9</sup> Muyungubale, muwuugulye, era mukuukulye olw’ebibbibbi ebimukolere. Enseko gyanywe gisuuke nduulu, n’eisangaalo lyanywe lisuuke kwekondamira. <sup>10</sup> Mwenenye omu maiso ga Musengwa, era owemwakola mutyo, iye yabasetula n’abawa ekitiisya.

### *Okutasaliranganiranga omusango*

<sup>11</sup> Boluganda, timwatumulanganangu obundi. Oyo atumula obubbibubi oku muntu omwinaye, ooba oyo asalira omwinaye omusango, abba abitiryemu amaiso eiteeka lya Kibbumba ery’okutakangana. Obityamu amaiso eiteeka lya Kibbumba obba otalire eiteeka nago, era ni weesuca mulamuzi. <sup>12</sup> Neye, eyatekerewo aMateeka era omulamuzi ali moiza, niye oKibbumba, oyo ayezya okulokola era n’okujigirica. Aale iwe asalira omwinawo omusango niwe naani?

### *Okulabula abeekudumbalya*

<sup>13</sup> Atyanu inywe abakoba muti, “Olwatyanu ooba eizo twaba omu kibuga kirebe tumaleyo omwanka gumo nga tusuubuula, tusune

amagoba,” <sup>14</sup> aate nga timumaite ebyabbaawo eizo. Mumaite kadi obwomi bwanywe ng’owebuli waire ekyezya okubutuukaku ekiseera kyonakyaona? Muli ooti kisu ekibbaawo akaseera katyayi kati ni kiwaawo. <sup>15</sup> Mwankakoberenge muti, “OMusengwa oweyaabba atakire, twabba boomi ni twezya okukola kinu ooba kidi.” <sup>16</sup> Neye inywe mwekudumbalya, era ni mwewaana oku bimwezya okukola. Okwewaanawaana okw’engeri eyo kwonakwona kubbikubbi. <sup>17</sup> N’olwekyo, oyo amaite ekisa ekiyankakolere neye n’atakikola, abba abbengere musango.

## 5

### *Okulabula abasuni*

<sup>1</sup> Atyanu, kunu kulabula eeri abasuni abataikirirya oYesu. Muwuugulye era mukuukulye olw’enyinya eyaba okubagwaku oKibbumba ng’abavunaana. <sup>2</sup> Obusuni bwanywe budambamu amakulu ooti kintu ekivundire. N’ebizwalo byanywe eby’ebbeeyi biri ooti biidi eby’ebituli ebiwuuka ebigiriire. <sup>3</sup> Ebyobusuni byanywe by’obukukumpanya, era obukukumpanya obwo bwabalumiriza, ni bulya obwomi bwanywe, ng’omusyo owegwoca ekisaka. Era oku nkomerero oKibbumba n’abukolesya oku basingisya omusango. Mukumbaanirye obusuni, ni mwerabira muti enkomerero y’ekyalo n’okubasalira omusango biri kumpi okutuuka. <sup>4</sup> Ala empeera y’abapakasi

abakolere omu misiri gyanywe egimwalyakire ngeyo ebbookooka, era enduulu gy'abo abakolere gigwire omu matwi ga Musengwa oWabwezye bwonabwona. <sup>5</sup> Musangaaliire omu by'oku kyalo nga mwejalabya era ni bibawoomera. Atyanu ngoyo mweyagala amantamanya muti olunaku oKibbumba oluyababonereza lutuukiriire. <sup>6</sup> Mugira omusango ni gusinga oyo atabbair nagwo, era ni mumwita nga tabalwanisya.

### *Okuguminkiriza*

<sup>7</sup> Aale inywe boluganda, newankubbaire nga bali kubagadya, muguminkirizenge paka oMusengwa oweyaliirira. Timubonera oku mulimi ng'owaakola? Akuumirira paka oweyalisuna oikendi asooka n'oyo omusambya, ng'aguminkiriza omusirigwe okuneneka ebineneka eby'omugaso. <sup>8</sup> Nywena muguminkirizenge, mugume emyoyo, olwakubba oMusengwa ali kumpi okwira. <sup>9</sup> Boluganda, timwezulugumiranganiranga, kaisi baleke okubasalira omusango. Ekyo kityo olwakubba omulamuzi ali aawo kumpi.

<sup>10</sup> Boluganda, mubonere oku banaabbi abatumulanga omu liina lya Musengwa, abagadire, neye ni baguminkiriza. <sup>11</sup> Era abo abaguminkirizire tubeeta b'enkabi. Mwawuliire ng'oYobbu, omwikirirya ow'eira, oweyaguminkirizire. Era mumaite oMusengwa ekiyamukoleire oluzwanyuma, olwakubba oMusengwa w'ekisa era asaasira.

<sup>12</sup> Kaisi tete, boluganda, kinu kikulu ino; timulayiranga, waire nga mujulira eigulu, abba ekiri oku kyalo, ooba ekintu ekindi kyonakyona. Okolanga ekintu, ni bakubuulya, oiramu oti niikyo, ni kimala, amantalayiriraku. Mukobenge muti, “Niikyo,” nga mutegeeza muti niikyo; ooba muti, “Bbe,” nga mutegeeza muti bbe, kaisi awo mulame okubbenga omusango.

<sup>13</sup> Mwinywe waliwo alaada? Yeegairire oKibbumba. Waliwo asangaire? Ayembe ebyokuwuuja oKibbumba. <sup>14</sup> Mwinywe waliwo alwaire? Ayete abakaire b’ekanisa bamusabire nga webamusiiga amafuta, omu liina lya Musengwa. <sup>15</sup> Okusaba okwo, okwizwire okwikirirya, kwalamya omulwaire oyo, oMusengwa n’amwisuuca. Era owaabba nga yakolere ebibbibbi, balibimusoniya. <sup>16</sup> Kale mubbutuliranganirenge ebibbibbi byanywe era musabiranganirenge, kaisi oolwo mulame. Okusaba okw’omuntu atuukiriire kw’amaani era kukola.

<sup>17</sup> N’onaabbi Eriya yabbaire yena muntu ooti niiswe. Cooka yasabire ino oKibbumba oikendi aleke okutoonya oku kyalo, era nandi n’atoonya okumala emyanka misatu n’emyeri mukaaga. <sup>18</sup> Tete n’asaba, era oKibbumba n’atoonyesya oikendi, eitakali ni libala ebibala.

### *Okwirya abakola ebibbibbi*

<sup>19</sup> Boluganda, omoiza kwinywe owaagotanga n’azwa oku mazima kaisi ogondi n’amwiryawo,

<sup>20</sup> oyo amwiriryewo akimanye ati alamirye omwoyo gw'oyo akola ebibbibibi okufa, era agirire oKibbumba n'asoniya ebibbibibibye ebingi.



**Endagaano Empyaka Omu Lugwere**  
**Gwere: Endagaano Empyaka Omu Lugwere (Bible)**

copyright © 2019 Wycliffe Bible Translators, Inc.

Language: Gwere

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 21 Feb 2024 from source  
files dated 29 Jan 2022

03698e2d-9c8d-5b1f-bc49-b0066e860180